

Broj protokola:
02.10.2012.

SAOPĆENJE ZA MEDIJE

Centar za kulturu dijaloga je po treći put, uz finansijsku podršku UNDP-a organizirao Seminar i interaktivnu radionicu „Kroz debatu saznajmo više o HIV-u“. Seminar je bio organiziran u Hotelu Grand, i bio je namijenjen učenicima i profesorima srednjih škola, učenicima i nastavnicima osnovnih škola, kao i svima koji smatraju da edukacija o HIV-u treba biti implementirana kontinuirano i u Bosni i Hercegovini koja, bar za sada, ne spada u zemlje sa visokom stopom zaraženosti odnosno obolijevanja stanovništva.

Na seminaru je učestvovalo preko 80 mladih osoba i njihovih profesora iz cijele BiH. Po prvi put gradovi: Banja Luka, Breza, Novi Travnik, Stolac i Zvornik su imali svoje predstavnike na Seminaru koji je dio globalne kampanje UNDP-a za smanjenje broja zaraženih/oboljelih i povećanje broja educiranih osoba. Pored ovih gradova, na seminaru su učestvovali i učesnici iz gradova: Bijeljina, Brčko, Čelić, Donji Vakuf,, mHadžići, Ilijaš, Istočno Sarajevo, Kladanj, Konjic, Mostar, Novi Grad, Pale, Sarajevo, Srebrenik, Tešanj, Tuzla i Visoko, kojima je ovo već treći put da imaju svoje predstavnike.

Tokom trodnevnog Seminara učesnici su imali priliku:

- Analizirati međunarodne dokumente koji regulišu prava zaraženih/oboljelih osoba:
Politička deklaracija posvećena HIV/Aids-u
Opća deklaracija o ljudskim pravima
Evropska konvencija o ljudskim pravima
Međunarodni pakt o ekonomskim, socijalnim i kulturnim pravima
Generalni komentar 12 na član 14 Međunarodnog pakta o ekonomskim, socijalnim i kulturnim pravima
Međunarodne smjernice o HIV/AIDS-u
- Upoznati se sa definicijama osnovnih pojmova koji su korišteni tokom seminara: HIV, AIDS, stigma, diskriminacija, ljudska prava, zakonski okvir, etika, etički komitet, argument, brainstorming, istraživanje, istraživački materijal
- Predložiti planove rješenja za teze:
„Škole treba da posvete više pažnje senzibiliziranju učenika i profesora za uklanjanje predrasuda o HIV zaraženim osobama“
„Srednjoškolci javnim debatama i kampanjama u školama mogu i trebaju pomoći prevazilaženju predrasuda prema HIV zaraženim osobama“
- Igrati uloge osoba koje su na različite načine involvirane u rad sa zaraženima i oboljelima

Tokom svih aktivnosti seminara mladi i njihovi profesori su kreirali brojne zaključke o HIV/AIDS-u u BiH od kojih su najvažniji:

- Bh. društvo i dalje stigmatizira i diskriminira zaražene i oboljele
- Mediji u BiH rijetko govore o HIV/AIDS-u. Izuzetak je 01.12. – Svjetski dan borbe protiv AIDS-a

- Vlasti u BiH ulažu nedovoljno novca u edukaciju, posebno mladih, o ovoj temi čime mlade, kao najrizičniju skupinu, stavljaju u još rizičniji položaj – položaj needukovanih osoba koje ne poznaju bolest od koje bi se trebali zaštititi
- Mladima se rijetko daje prilika da istražuju spolno prenosive bolesti, jer su u bh. društvu ove bolesti „sramota“, „crna mrlja na imenu“, „bolesti lakih žena“...

Poseban akcenat tokom Seminara je bio stavljen na kreiranje planova, na nivou lokalne zajednice, odnosno škole za prevazilaženje i smanjenje predrasuda prema zaraženima i oboljelima. Neki od planova uključuju:

- Edukaciju koja će biti provedena na nivou lokalne zajednice, a koju će besplatno provoditi mladi koji su stekli znanja tokom seminara.
- Izradu promotivnih materijala u kojima će biti sadržane osnovne informacije o virusu, bolesti i načinima prevencije.
- Podjelu promotivnih materijala na najfrekventnijim gradskim ulicama.
- Praćenje izvještavanja svjetskih medija o najsmrtonosnijem virusu današnjice, a koja će preuzimati i emitovati mediji u BiH
- Kreiranje posebnog odjeljenja u biološkim sekcijama u školama, a čije primarne aktivnosti bi bile u vezi sa seksualno prenosivim bolestima.

Zaključak učesnika nakon seminara: BiH mora postati dio globalne kampanje koju provodi UNDP za smanjenje broja oboljelih ali i smanjenje stigme i diskriminacije prema zaraženima/oboljelima. Edukacija je prvi korak u kampanji. Mali korak za čovječanstvo ali veliki za bh. društvo.